

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Mizoramah vawk pul hri- African Swine Fever a len hriat a ni rih lo a, khawi lai hmunah erawh vanduai thilthu a thihpui an awm thung.
2. Naupang kum tling lo pakhat hnen atangin police ten Heroin hawng 2 an man.
3. Zanin hi Lal Isuan a Zirtirte Zanriah Hnuhning a kilpui zan, Ningani Thianghlim a ni a, Kohhran hrang hrang ten Lalpa Zanriah Sacrament an changho ang.
4. Parliamentary Affairs Minister, Kiren Rijiju-a'n hmeichhia-te tana seat hauh chungchang ngaihtuah turin hapta hnih thum hnuah Parliament inkhawm koh leh a ni ang, a ti.

<><><>

**ASF**

Mizoramah vawk pul hri- African Swine Fever a len hriat a ni rih lo a, khawi lai hmunah erawh vanduai thilthu a thihpui an awm thung.

ASF hri hian Mizoram a chenchilh tawh avangin, khawiah emaw chuan a lang chhuak ve reng tih AH & Vety Dept hotute chuan an sawi a, tun dinhmunah state pawn atanga a lo luh leh luh loh finfiahna pawh a awm rih lo an ti a ni.

Akashvani News zawhna chhangin AH & Vety Director Dr Lalrotluanga Sailo chuan African Swine fever in kum 2021 March thla a Mizoram a luhchilh hnuin kumtin ASF pul hri avanga vawk tamtak thih bakah engemawzat suat an ni thin a, ASF hian Mizoramah bu a khuar tawh avangin vawk chauh nilo sanghal engemawzat in an thih pui tawh a ti a, Sanghal te chu ramhnuai a cheng an ni a ASF an kai tawh chuan vawk vulh te tan an hlauhawm hle bawh a ni a ti.

Hei bakah hian Kum 2026 ah ASF lo lang leh hi State pawn atang vawk lakluh vang niloin Mizorama hrik awmsa niin a lan thu a sawi a, tunhnai a Durtlanga ASF avanga vawk thi nemngheh te pawh a hri a len rih loh vangin vanduai ve nawlh a ngaih a nih thu a sawi a, tun dinhmunah state thenawmah te ASF hi a leh hriat a ni lo a ti bawh.

Puan tawh angin nimin khan All Mizoram Vawk Vulh Assn chuan thuchhuah state pawn a vawk lakluh atanga ASF hi darh ni ngei a rin a nih thu sawiin hri hi a darh zel loh nan state pawn atanga vawk lakluh an khap tih an sawi a. ASF darh zel loh nan hian District Magistrate ten state dang atanga vawk lakluh khapna chhuah mahse tun hnaiah Serchhip District huam chhungah vawk tam tak ASF avangin thi an awm leh a, hei hi a pawh takzet a ni an ti a.

African Swine Fever (ASF) hri hi a darh zel lohna turin state pawn atangin vawk lakluh phal a ni lo a. AMVVA chuan he thuchhuah bawhzui hian thu zawm lo apiangte chungah a tul angin hma na takin a la ang an ti.

Corr: Maremi/Hruaia Aizawl PTC

<><><>

**MUCHS**

Mizoram Universal Healthcare scheme (MUHCS 2.0) chu hman tan a ni a, MUHCS hnuai hian online leh offline kaltlangin chhungkaw 12,121 an in ziaklut tawh.

Mizoram sawrkar chuan February ni 16 atanga tun thla April ni 16 thleng khian MUHCS 2.0 hnuai man chawia online-a in ziah luh hun a hawng a. Akashvani News Aizawl zawhna chhangin, MUHCS inziaklut zat hi minute tin an pun belh reng a, vawiin chhun dar 12 leh a chanve thleng khan online leh offline kaltangin mi 12121 an inziaklut tawh a. Internet that lohna khua 269-a health sub centre-ah te vawiin atangin offline hmanga inziah luh theihna hawn a ni a, inziak lut zat hi inziah luh hun a tawp hnuah hriat theih a ni chauh dawn tih MUHCS hotute chuan an sawi a ni.

*MUHCS 2.0-ah hian cheng 2,500, 5,000 leh 10,000 te a inziah luh theih a ni dawn a. Hei hian chhungkaw khat tan cheng Nuai 5 hu thleng man chawi lova inenkawlina a huam a, hnathawk nghet zawng zawng chu inziah luh ngai loin an tel sa a, an hlawh atangin thla tin pawisa an thawh dawn a, Civil Pension leh AB-PMJAY (Golden Card) hmangte tan pawh a hranpaa inziahlul ngai loin, MUHCS-ah an tel sa bawk.*

Vawiin khan MUHCS 2.0 chungchangah sorkar chuan hriattirna tihchhuakin, sorkar hnathawk nghet lo (Govt Employees/PE) leh mipui nawlpui man chawia inziak lut (General Beneficiaries) te chuan MUHCS hmang turin MUHCS card an neih hmasak ngei a ngai a, MUHCS Card hi siam hun bituk a awm lo a, mahni remchan dana siam mai theih an ti. CSS/GIA, Pensioner leh AB PM-JAY (Golden Card) hmang thei tan erawh tun dinhmunah MUHCS Card siam a la ngai lo thung a. CSS/GIA leh Pensioner tan MUHCS Subscription form hmangin MUHCS hnuai ah enkawlina an dawng thei a, AB PM-JAY chhungkua tan Golden card hmangin MUHCS hnuai ah enkawlina a dawn theih bawk.

<><><>

## **HEROIN SEIZED**

Naupang kum tling lo pakhat hnen atangin Heroin hawng 2, cheng 4,60,000 hu Police ten an man.

Khawzawl PS Special Team chuan nimin khan Champhai Tlangsam a Tuisenphai Check Gate-ah naupang kum tling lo pakhat hnen atangin Heroin hawng 2 an man a. Heroin hi gram 23 a rit niin, cheng 4,60,000 hu a ni a. Khawzawl Police Station-ah ND&PS Act hnuai ah thubuai ziah luh niin, dan bawhchhetu hi kumtling lo a nih angin Principal Magistrate, JJB Khawzawl kutah hlan a ni.

Khawzawl PS Special Team vek hian nizan hmasa khan lirthei pakhat chu Tuisenphai Check Gate-ah endikin he lirthei atang hian dan lova ramdang atanga laklul, Foreign Cigarette bawm 20, cheng 8,00,000 hu an man bawk.

An thil man hi Assistant Controller, Legal Metrology, Champhai hnenah dan anga hmalak chhunzawm turin hlan a ni.

Corr: Maremi & Hruaia PTC

<><><>

## **MZP**

Mizo Zirlai Pawl (MZP) chuan Mizoram State University din turah Politics bawlhhlawh a inrawlh loh nan leh zirlaiten an tawrh loh nan dik leh felfai taka hnalak a nih theih nan hma lak an tum.

Vawiina, MZP General Headquarters Executive Committee Meeting ah April ni 10-a MZP Federal Council 2026 ah chhawp chhuah tura relin, Zirtirtu indaihlohna rualkhai zawka sem-rual a nih theih nan nasa zawkin Sawrkarin hma la rawh se tih te, Mizoram-a Inner Line Permit (ILP) hman dan kalphung (System) hi tun aia khauh zawk leh changkang zawka kalpui a nih theih nan MZP-in hma la rawh se tih te, Zirna In hrang hrangah Zounun Zemawi inzirtirna kalpui a nih theih nan MZP in hma la rawh se tih te a tel a.

Hei bakah hian Mizoram University-in MZU Sports a buatsaih thin-ah tun aia Budget a tam theih na turin MZP in hma la rawh se tih te, Mizo zirlaiten harsatna an tawh thin avangin CUET (UG/PG) Center tam zawk Mizoram-a a awm theih nan hmalak ni rawh se tih leh Mizoram College 21 ten Principal nghet an neih theih nan a tul angin Sawrkar-in hma la rawh se tih te thurel tur zingah hian an telh a ni.

**PR**



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



## MAUNDY THURSDAY

Zanin hi Lal Isuan a Zirtirte Zanriah Hnuhnung a kilpui zan, Maundy Thursday a ni a, Kohhran hrang hrang ten Lalpa Zanriah Sacrament an changho ang.

Ningani Thianghlim/ Ven Zan an tih Isua Krista man tira a awm tur lo venpuina hun hi kohhran hrang hrangin urhsun takin an hmang ang.

Kan corr report ngaihthla ang.

*Catholic kohhran chuan 'Ningani thianghlim' hi urhsun taka hmangin he hunah hian Isua'n a zirtirte nen zanriah hnuhnung an kilna chhui tharin Eucharist thianghlim buatsaih a nih dawn bakah Isua'n a lo zirtir angin Ke-sil Rawngbawlna hun an hman dawn a. He hunah hian puithiamte chuan kohhran chhung atanga mi 12 thlanchhuah te ke an silsak dawn a, hei hian Isua'n hmangaihna leh inngaihtlawm a zirtir kha a entirna leh ti ve tura a tihna chhunzawmna a ni a. Bishop Most Rev. Stephen Rotluanga chuan St Francis Xavier's Parish Lawngtlai ah a hmanpui dawn a ni.*

*Presbyterian kohhran puipate'n tualchhung kohhran hrang hrangah Lalpa Zanriah sakramen an thehpui dawn a. Synod Moderator Rev. John Raldosanga chuan Zonuum East Kohhranah a hmanpui ang.*

*Mizoram Baptist Church (BCM) chuan zanin hian Lalpa Zanriah sakramen an theh dawn a, BCM Gen.Secy Rev.Lalthlamuana chuan zanin hian BCM Bazar Veng Biak In, Lungleiah Lalpa zanriah a buatsaih ang.*

*United Pentecostal Church of North East India (UPC-NEI) pawhin zanin hian Sacrament an kilho dawn a, Pastor/Tirhkoh/Kohhran Upaten Ke Sil rawngbawlna Kohhran member te hnenah an nei thin a, UPC-NEI Superintendent Pu Laldusanga chuan zanin hian Bungkawn kohhranah Sacrament a kilpui dawn a ni.*

*Maundy Thursday hi kohhran-te'n Isua Krista kraws a khenbeh a a awm champha Good Friday serhna hun intanna-ah an ngai a. Pathianni kalta, Isua lal anga Jerusalem khawpui a a luh ni atang khan chawlhkar thianghlim hman tan a ni.*



## PARLIAMENT TO RECONVENE

Parliamentary Affairs Minister, Kiren Rijiju-a'n Parliament thutkhawm kal lai chu wawiinah tiam chin awmlova tih tawp a ni ang a, amaherawhchu hmeichhia-te tana seat hauh chungchang ngaihtuah turin hapta hnih thum hnuah inkhawm koh leh a ni ang, a ti.

He thu hi wawiin Rajya Sabha inkhawma Cong member, Jairam Ramesh-a zawhna a chhanna-ah sawiin Pu Rijiju-a chuan hmeichhiate tana seat hauh chungchangah hian sorkar chuan political party zaa 80 chuang a berawn tawh, a ti a, heti chung hian eptu pawl lian ber Cong chuan sorkar chu Assembly inthlan neih zawha Parliament thutkhawm ko leh tura ngenna, ziakin an thlen a ni, a ti.

Sorkar chuan hemi chungchang hi ama duhthu leh tha a tih ang ringawta kalpui lovin party leh MP zawng zawng ngaihdan lak hmasak a duh tih pawh sawiin hmeichhiate tana seat hauh chungchang chu Parliament-ah lungrual taka pass a ni tur a ni, a ti bawk.

(NSD)

